

-Sportelet në pjesën e re të terminalit shmangin plotësisht vonesat në përpunim-

Që nga fillimi i muajit korrik nëpërmjet portit detar të Durrësit kanë lundruar me tragete mbi 307 mijë udhëtarë me 78 mijë autovetura gjithsej.

Sipas Përgjegjësit të këtij sheshi, Niko Simo që nga 12 gushti fluksi i udhëtarëve që largohen pas pushimeve përmes portit të Durrësit është rritur vazhdimisht dhe gjatë këtyre ditëve nuk ka patur asnjë vonesë në përpunimin e trageteve dhe katamaranëve.

“Imbarkimi i autoveturave dhe udhëtarëve nga sheshet drejt trageteve në nisje nga Durrësi është bërë paralelisht në 23 sportelet ekzistuese si dhe në 12 sportelet e reja për autovetura dhe kamjonë që kanë nisur të funksionojnë para 10 ditësh në zonën perëndimore të Terminalit të ri të trageteve”-citet z. Simo, sipas të cilit afro 80 përqind e udhëtarëve që shfrytëzojnë tragetet në nisje dhe në kthim nga Durrësi nuk kanë nevojë të zbresin nga autoveturat gjatë kontrollit kufitar.

Numri i udhëtarëve që largohen nga Durrësi këto ditë është 5-6 herë më i lartë se sa i atyre që mbërrijnë me mjetet e mëdha lundruese.

Shifrat e periudhës 1-25 gusht janë rreth 32 përqind më të larta se sa i gjithë muaji korrik i këtij viti, ndërsa parashikohet një numër i lartë udhëtarësh deri më 15 shtator.

Kompanitë e lundrimit kanë vënë në dispozicion të udhëtarëve 15 tragete dhe katamaranë, disa prej të cilëve në fundjavë kryejnë dy lundrime në ditë. Çdo ditë në portin e Durrësit përpunohen mesatarisht 5 mijë udhëtarë dhe 1300 automjete, ndërsa në fundjavë numri i tyre dyfishohet.



